

HEADLINES (EVENING)

1. Larsap General (Retd) Vijay Kumar Singh-an "Ashtalakshmi Darshan Youth Exchange Programme" kaltlanga Mizoram rawn tlawhtu Andaman and Nicobar Islands leh Lakshadweep atanga zirlai te vawiin khan a kawm.
2. Nikum 2025 January thla atanga September thla chhung khan ram dang atanga Mizorama zin lut zingah Myanmar khua leh tui an tam ber.
3. Nitin Nabin chu BJP President thar anih thu vawiin khan puan a ni.
4. Human Rights News Agency chuan Iran-a rampum huap sawrkar laka lungawilohna lantirnaah mi 4019 an thi a, mi 26000 chuang man an nih thu a puang

<><><>

GOVERNOR

Larsap General (Retd) Vijay Kumar Singh-an "Ashtalakshmi Darshan Youth Exchange Programme" kaltlanga Mizoram rawn tlawhtu Andaman and Nicobar Islands leh Lakshadweep atanga zirlai 40 leh zirtirtu 4 te chu Lok Bhavan Durbar Hall-ah vawiin khan a kawm.

Larsap chuan he hun hi India hmarchhak state-te hriat chian leh zual nana hman tum turin a fuih a. Mizoram chu an rawn kalna Andaman and Nicobar Islands leh Lakshadweep ang bawka mihring cheng tam lohna leh hmun mawi tak, industry lian awm lohna leh ramngaw nei tam a nih avanga sik leh sa nuam tak a nih thu a sawi a. Mizoram chu zia leh chhiar thiam vekna state-a puan a nih thu sawiin, National Education Policy 2020 inkaihhruaina zulzuiin ama pual State University a neih dawn thu a sawi bawk.

Larsap chuan kum 1986-a Mizoram Peace Accord ziah a nih hnuah Mizoram chu India rama state ralmuang ber a nih thu sawiin, hmasawnna pawh chak taka kal chhoh mek thu a sawi a. Nikumah Bairabi-Sairang railway line hawn a nih thu sawiin, Mizoram chhim tawp thlang railway line siana Kaladan Multi-Modal Transit Transport Project (KMMTTP) nena thlunzawm tum a nih thu a sawi a. Mizoram chuan agriculture, horticulture leh ram hmul damdawiahte theihna nasa tak a neih thu sawiin, supply chain leh hralhna tha a awm phawt chuan hmasawnna nasa zawk a thlen theih thu a sawi bawk a. Zirlaite chu Mizoram an cham chhunga hun hlimawm leh hlawkthlak tak hman turin duhsakna a hlan a ni.

Ashtalakshmi Darshan Youth Exchange Programme hi hnam inpumkhatna chawilar nana Sawrkar laipui hmalakna pawimawh tak, DoNER Ministry hnuai kalpui a ni a. Hemi programme hman hian hmarchhak state leh India ram hmun danga zirlaite chu hnam ziarang leh nunphungte zirin an intlawhpawh thin a ni.

Ashtalakshmi Darshan Youth Exchange Programme hmanga Mizoram rawn tlawhtute hian ni 15 khan Mizoram an lo thlang a. Mizoram University-ah innghatin an cham chhung hian mithiam tak tak te'n North East India chanchin hrang hrang an zirtir dawn a. Ruahman dan chuan ni 28 khian Mizoram an chhuahsan ang.

<><><>

VARTALAP

Sorkar laipui Ministry of Information & Broadcasting hnuai Press Information Bureau (PIB), Aizawl chuan vawiin khan Serchhip Press Club-ah chanchinbumite leh khawtlang hruaitute pualin 'Viksit Bharat - Guarantee for Razgor and Ajeevika Mission (Gramin) Act 2025' leh 'PM Vishwakarma Scheme' zirhona a buatsaih.

He hun hmanpuitu Serchhip District Addl DC Pu Lalrinzuala chuan PIB chu hun rei tak chhung sawrkar laipui hmalakna pawimawh hrang hrang hriatna pawimawh tak a ni thin a ti a, Vartalap kaltlangin central scheme chu mipuiten an hriat theih phah a beisei tih sawiin sawrkar laipui scheme a nih angin mipui ten a chipchiar taka an hamthatna tur hrang hrang an hriat theih nan puan chhuah tam a pawimawh a ti a, scheme hrang hrang chu Mizoramah hlawhtling tak kalpui a nih theih nana zirtir mi tin tanrual a ngaih thu a sawi bawk.

Press Information Bureau hotupa Dr. Rajeev Lourembam chuan, sorkar laipui scheme pawimawh pahnihte chu khawpui atanga thingtlang kilkhawr thlenga cheng ten Chiang zawka an hriat theih nan zirhona chu buatsaih a nih thu a sawi a; zirho tur scheme chu mipui ten an tangkaipui ngei a beisei thu a sawi.

Wawiina hun hmanah hian Serchhip Joint VC, MHIP leh Sub. Hqrs YMA hruaituten thu an sawi a; chawhnu lamah Serchhip ARDO Pu Stephen Laltlansanga Auhmun chuan G-RAM-G Act, 2025 chungchang a sawifiah a, Serchhip Commerce & Industries Dept atangin Pi C. Vanlalhriatpuii PM Vishwakarma Scheme chungchang kalkhawmte a zirtir bawk.

Media Workshop ‘Vartalap’ ah hian Mizoram Journalist’s Association Aizawl leh Serchhip bakah Serchhipa YMA leh MHIP hotute an tel a, mithiamte nhen atanga sawrkar laipui scheme sawi ho a nih bakah zawhna leh chhanna hun hman a ni.

<><><>

CHAPCHAR KUT

Kumin Chapchar kut chu kar khat chhung hman tura ruahman a ni a,

Wawiina Chief Minister Pu Lalduhoma kaihhruai Chapchar Kut 2026 Organising Committee thukhawm chuan Chapchar Kut hman dan tur hi an rel a, March ni 9, Thawhtanniah Kut puala tlan (Kut Run) neia kut lawmna bul tan tur a ni a. He tlan pual hian kum dang ang bawkin Central YMA-in anmahni sensovin T- shirt a lo buaipui leh ang.

A lawmna pui ber hi March ni 13 Zirtawpniah Lammualah neih tur a ni a, darkar ruk chhung a awh ang. Chief Minister Pu Lalduhoma chu Kut Pa a ni ang a, Art & Culture Minister Pu C. Lalsawivunga chu kut thlengtu a ni ang. Bawlhhlawh hnutchhiah lo Kut (Garbage Free Kut) kalpui tum a ni.

Kum 2026 Chapchar Kut thupui atan hian "Zo nun ze mawi - Inremna" tih chu committee hmasa lamah lo thlan fel tawh a ni. Kumin atang hian Chief Minister chawimawina Nopui sem a ni tawh dawn a. Nopui dawngtlaka ngaih rawtna hrang hrang lut zing atangin a tum khatnaa dawngtu turte chu wawiina committee hian an thlang a ni. Chief Minister Nopui hian pawisa fai Rs. 1 lakh, Citation leh Memento te a keng ang.

<><><>

FOREIGN TOURIST

Nikum 2025 January thla atanga September thla chhung khan ram dang atanga Mizorama zin lut zingah Myanmar khua leh tui an tam ber.

Mizoram Tourism Department in a chhinchhiah danin, nikum 2025 January thla atanga September thla chhung khan ram dang atanga Mizorama rawn zin lut mi 7,866 an awm a, chung zingah chuan Myanmar atangin mi 5334 an tel a, an tam ber a ni. Myanmar hi United States in dawtin hemi hun chhung hian mi 879 an rawn zin a, Japan chu pathumna niin mi 197 an rawn zin a, United Kingdom atangin mi 176, Australia atangin mi 161, South Korea atangin mi 153, Germany atangin 82, hetihlai hian Mizoram thenawm, Bangladesh atanga lo zin an chhinchhiah chu mi 7 chauh an ni thung. Heng ram bakah hian, Canada, China, Egypt, leh Israel tiamin nikum chhung khan ram hrang hrang 50 chuang atanga zinmi ten Mizoram an rawn bawk a ni.

Nikum 2025 January thla atanga September thla inkarah khan July thla chu ram dang atanga zinmi an lo luh tam ber tum niin mi 1,650 an lo zin a, August thla in dawtin mi 1,518 an rawn zin a, June thlaah mi 1,197 an rawn zin a, May thla kha an tlem ber tum niin zinmi 298 in Mizoram an rawn tlawh a ni. Kan corr report lo ngaithla ang.

Akashvani News Aizawl zawhna chhangin, Tourism Department hotute chuan ram dang atanga zinmi an chhinchhiah te hi Mizorama khualbuk Hotel, Guest House leh Homestay te bakah, Airport leh rel station entry point, check gate hrang hrang leh zinmi te tana hmun tlawh tur awm a ticket lakna hmun atang te in an lakhawm tih an sawi a, zinmi an chhinchhiah zingah chhinchhiah nawn an awm theih rualin chhinchhiah loh tam tak an neih an rin thu sawiin, Mizoram pawn atanga zinmi lo lut te chu chhinchhiah zat aiin an tam an rin thu an sawi bawk a ni.

<><><>

TAX REFORM

Sorkar laipuiin Income Tax bikah Tribal area a cheng Tribal mite a awl avangin chhiah zawng zawngah a awl vek tihna a ni lova, chhiah lak dan inlumlet chho zel chu Mizote’n an ngaihven a tul hle tih mithiamte’n an sawi.

He thu hi Akashvani Regional News Unit Aizawl-in a kawmnaah sawiin, Dr. Vanlalmuana chuan India ramah chhiah lak dan system lianpui pahnih-Direct Tax leh Indirect Tax a awm a ti a, Direct Tax chu hlawh (salary), sumdawmna leh thiam bik thil (profession) atanga pawisafai lakluh atanga chhiah pek ngai a ni a, Income Tax Act dan hnuaiah Tribal mi, notified Tribal area atanga pawisa a thawhchhuah te chu chhiah awl an ni a, hei hi Mizote pawhin chhiah an awl chhan a nih thu a sawi a, kumin April ni 1 atanga hman tan tur Income Tax Act 2025 hnuaiah chuan crypto currencies an tih token assets an tih te a huam chho dawn a, Act hmasa hnuaia thil khirkhan te pawh awlsam hnuaia dah a ni tawh dawn bawk a ti a, Indirect Tax chu mipuiten mamawh chi hrang hrang an lei atanga a zuartu kaltlanga chhiah hrang hrang sorkarah an chhung ve thin a

ni a ti a, ram danga bungraw lakluh leh thawncchhuah atanga chhiah lak - Custom Duty, tuialhthei leh zu lama state sorkarin exise duty a lak tih loh chhiah lak dan hlui, state chhunga bungraw siam leh leia chhiah lak-VAT, state leh state inkara central sales tax, service tax, entertainment tax te chu bungraw siam chhuahna bika excise duty lak thin te chu luankhawm tirin, Goods and Services Tax (GST) ah siam a ni tih a sawi bawk a ni.

Dr. Vanlalmuana chuan chhiah lak dan hlawm hnih chuan Mizote pawh a huam vek a, Income Tax bikah Tribal area a cheng Tribal mite a awl avangin chhiah zawng zawngah a awl vek tihna a ni lo tih hriat reng a tha a ti a, nakinah Sorkar laipuiin chhiah lak dan hrang hrang thar a siam hun te a awm dawn a, Mizote a nghawng dan pawh a inang lo thei a, chhiah lak dan inlumlet chho zel chu Mizo ten an mawhpurhna a ni tih hre reng a an ngaihven a tul hle tih a sawi a ni.

<><><>

AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve ah Chanchinthar puan leh a ni ang.

<><><>

DISASTER TRAINING

State Disaster Management & Rehabilitation (DM&R) Departmentleh 1 Mizo Bn National Cadet Corp (NCC) te thawhhona hnuaiah chhiatrupna thlen thulha chhanchhuah hna thawh dan training ni 7 awh chu vawiin khan khar a ni a,

5th Batch Training of Yuva Aapda Mitra hi Mizoram Scouts & Guides Training Center, Tanhril-ah vawiin khan DM & R Minister Professor Lalnilawman a hmanpui a ni.

Minister chuan " Khuarel Chhiatna lo thlen pawh a, chet lak dan zir chu a pawimawh hle a ni, a ti a. He hun a National Cadet Corps (NCC) leh Volunteer kalkhawmte chu khuarel chhiatna a lo thlen palh pawhin midang thlamuan tura hmahruaitu ni turin leh midangte tana inpekna thinlung puchungin, chhanchhuah leh chhawmdawl hna thawk tura inpeih reng turin a fuih bawk a ni.

5th Batch Training of Yuva Aapda Mitra Training-ah hian College pakua atanga National Cadet Corps (NCC) Cadet 112-ten tluang takin Training an zo a. Yuva Aapda Mitra Scheme tum ber chu, khawtlangah chhiatrupna a thlen thulh a, hmun dang atanga chhanchhuaktute an lo thlen hma a, khawtlang miten chhanchhuah hna an lo thawh theih nana thalaite buatsaih hi a ni a. Tun ah hian Lunglei, Champhai, Kolasib, Serchhip leh Mamit District tan Training kalpui mek zel a ni a. Vawiin a Training khar zawh chiah nen hian thalai rual, NCC, NYKS, Bharat Scout & Guides leh NSS mi 531 Trained chhuah an ni tawh.

<><><>

BJP

BJP President thar atan Nitin Nabin chu vawiin khan puan a ni. BJP National Returning Officer Dr.K.Laxman chuan BJP National President thar hi vawiin khan puangin President inthlannaah hian Pu Nabin-a hming chauh hi chuh tura hming rawt anih thu a sawi a.. Dr.Laxmana sawidanin National President tura nomination paper 37 lut zawng zawngin Nitin Nabin hi an rawt vek tih a sawi a. Nomination paper te hi uluk taka endik anih hnuin dan ang thlapa kalpui anih thu a sawi a ni. BJP National President JP Nadda, Union Minister Amit Shah, Rajnath Singh, Nitin Gadkari leh Parliamentary Board memberten Nitin Nabin hi an rawt vek a ni.

BJP President thar hi Prime Minister Narendra Modi, Union Minister Amit Shah, Rajnath Singh, JP Nadda leh Nitin Gadkari ten a hmunah lawmpuina hun an hmang a. Thusawiin BJP National President thr Nitin Nabin chuan an party-a dinhmun sang ber chang theia hun tha petu Prime Minister Modia hnenah lawmthu a sawi a. Party hrulaitu senior ten an thlan avangin lawmthu a sawi bawk a ni.

Nitin Nabin hi BJP National President ni thei naupang ber a ni a. Bihar atanga BJP hrulaitu atana ruat hmasak ber a ni bawk a. Bankipur Assembly bial atanga thlan tlin niin Nitish Kumar-a Cabinet ah Road Construction Minister a ni a. Kum 20 dawn politics khawvelah hun a hmang tawh a. BJP chhunga nihna pawimawhte chelh tawhin heng zingah hian Bihar BJP thalai President leh Chhatisgarh-a BJP election incharge nihna te a lo chelh tawh a ni.

<><><>

IRAN

Human Rights News Agency chuan Iran-a rampum huap sawrkar laka lungawilohna lantirnaah mi 4019 an thi a, mi 26000 chuang man an nih thu a puang. Mitthi tam zawk hi lungawilohna lantirtute an ni a, an zingah hian naupang pawh an tel tih a tarlang a. Davos-a World Economic Forum neih mekah Iran Foreign Minister Abbas Araghchi thusawi tura sawmna pawh hetiang zat mitthi an awm avang hian hnukkir a ni a. Munich Security Conference pawhin Iran sawrkar aiawh a sawmna pawh a hnukkir a. Hetihlai hian Iran hruaitu lu ber Ayatollah Ali Khomeinei chuan mi sang chuang an thih thu hi pawmin a chhan berah US a puh thung a ni.

<><><>